

大智度初品中摩訶薩埵釋論第九(卷第五)

龍樹菩薩造

後秦龜茲國三藏法師鳩摩羅什奉 詔譯

[0094a19] 【經】

[0094a19] 摩訶薩埵。

[0094a19] 【論】

[0094a19] 問曰：

[0094a19] 云何名「摩訶薩埵」？

[0094a20] 答曰：

[0094a20] 「摩訶」者大；「薩埵」名眾生，或名勇心。此人心能為大事，不退不還，大勇心故，名為摩訶薩埵。

[0094a22] 復次，摩訶薩埵者，於多眾生中最高首故，名為摩訶薩埵。

[0094a23] 復次，多眾生中起大慈大悲，成立大乘，能行大道，得最大處故，名摩訶薩埵。

[0094a25] 復次，大人相成就故，名摩訶薩埵。

[0094a26] 摩訶薩埵相者，如〈讚佛偈〉中說：

「唯佛一人獨第一， 三界父母一切智；
於一切等無與等， 稽首世尊希有比！
凡人行惠為己利， 求報以財而給施；
佛大慈仁無此事， 怨親憎愛以等利！」

[0094b02] 復次，必能說法破一切眾生及己身大邪見、大愛慢、大我心等諸煩惱故，名為摩訶薩埵。

[0094b04] 復次，眾生如大海，無初、無中、無後；有明智算師，於無量歲計算，不能盡竟。

[0094b05] 如佛語無盡意菩薩：「譬如十方一切世界，乃至虛空邊際，合為一水，令無數無量眾生共持一髮取一滄而去，更有無央數眾生如前共持一髮取一滄而去，如是令彼大水悉盡無餘，眾生故不盡。」以是眾生等無邊、無量、不可數、不可思議，盡能救濟，令離苦惱，著於無為安隱樂中。有此大心，欲度多眾生故，名摩訶薩埵。

.....
[0095b12] 漚舍那言：「善男子！我願如是：自有世界已來，一切眾生盡清淨，一切煩惱悉斷。」須達那言：「是何解脫？」漚舍那答言：「是名無憂安隱幢。我知此一解脫門，不知諸菩薩大心如大海水，一切諸佛法能持能受。諸菩薩心不動，如須彌山；諸菩薩如藥王，能除一切諸煩惱；諸菩薩如日，能照除一切闇；諸菩薩如地，能含受一切眾生；諸菩薩如風，能益一切眾生；諸菩薩如火，能燒一切外道諸煩惱；諸菩薩如雲，能雨法水；諸菩薩如月，福德光明能照一切；諸菩薩如釋提桓因，守護一切眾生。是菩薩道法甚深，我云何能盡知！」

[0095b25] 以是諸菩薩生大願，欲得大事，欲至大處故，名「摩訶薩埵」。

[0095b26] 復次，是《般若波羅蜜經》中摩訶薩埵相，佛自說：如是如是相，是摩訶薩埵相。

[0095b28] 舍利弗、須菩提、富樓那等諸大弟子各各說彼品，此中應廣說。

大智度初品中菩薩功德釋論第十

[0095c02] 【經】

[0095c02] 皆得陀羅尼及諸三昧，行空、無相、無作，已得等忍。

[0095c03] 【論】

[0095c03] 問曰：

[0095c03] 何以故以此三事次第讚菩薩摩訶薩？

[0095c04] 答曰：

[0095c04] 欲出諸菩薩實功德故，應讚則讚，應信則信；以一切眾生所不能信甚深清淨法讚菩薩。

[0095c06] 復次，先說菩薩摩訶薩名字，未說所以為菩薩摩訶薩，以得諸陀羅尼、三昧及忍等諸功德故，名為菩薩摩訶薩。

[0095c09] 問曰：

[0095c09] 已知次第義，何以故名「陀羅尼」？云何陀羅尼？

[0095c10] 答曰：

[0095c10] 「陀羅尼」，秦言能持，或言能遮。

[0095c11] 能持者，集種種善法，能持令不散不失。譬如完器盛水，水不漏散。

[0095c13] 能遮者，惡不善根心生，能遮令不生；若欲作惡罪，持令不作。是名陀羅尼。

[0095c14] 是陀羅尼，或心相應，或心不相應；或有漏，或無漏；無色不可見無對；一持、一人、一陰攝：法持、法人、行陰；九智知(丹注云：除盡智)；一識識(丹注云：一意識)。阿毘曇法陀羅尼義如是。

[0095c18] 復次，得陀羅尼菩薩，一切所聞法，以念力故，能持不失。

[0095c19] 復次，是陀羅尼法常逐菩薩，譬如間日瘡病；是陀羅尼不離菩薩，譬如鬼著；是陀羅尼常隨菩薩，如善不善律儀。

[0095c22] 復次，是陀羅尼持菩薩，不令墮二地坑；譬如慈父愛子，子欲墮坑，持令不墮。

[0096a02] 復次，菩薩得陀羅尼力故，一切魔王、魔民、魔人無能動、無能破、無能勝；譬如須彌山，凡人口吹不能令動。

[0096a05] 問曰：

[0096a05] 是陀羅尼有幾種？

[0096a05] 答曰：

[0096a05] 是陀羅尼多種。

[0096a06] 一名聞持陀羅尼。得是陀羅尼者，一切語言諸法，耳所聞者，皆不忘失，是名聞持陀羅尼。

[0096a08] 復有分別知陀羅尼，得是陀羅尼者，諸眾生、諸法，大小好醜，分別悉知。

[0096a09] 如偈說：

「諸象馬金， 木石諸衣， 男女及水，
種種不同。 諸物名一， 貴賤理殊，
得此總持， 悉能分別。」

[0096a14] 復有入音聲陀羅尼，菩薩得此陀羅尼者，聞一切語言音，不喜、不瞋。一切眾生如恒河沙等劫惡言罵詈，心不憎恨。

[0096a16] 問曰：

[0096a17] 菩薩諸漏未盡，云何能如恒河沙等劫忍此諸惡？

[0096a18] 答曰：

[0096a18] 我先言：得此陀羅尼力故能爾。

[0096a19] 復次，是菩薩雖未盡漏，大智利根，能思惟除遣瞋心。作是念：若耳根不到聲邊，惡聲著誰？又如罵聲，聞便直過，若不分別，誰當瞋者？凡人心著吾我，分別是非而生恚恨。

[0096a23] 復次，若人能知諸言隨生隨滅，前後不俱，則無瞋恚。亦知諸法內無有主，誰罵誰瞋？若有人聞殊方異語，此言為好，彼以為惡，好惡無定，雖罵不瞋。若有人知語聲無定，則無瞋喜。如親愛罵之，雖罵不恨；非親惡言，聞則生恚。如遭風雨，則入舍持蓋；如地有刺，則著鞞鞋；大寒燃火，熱時求水；如是諸患，但求遮法而不瞋之。罵詈諸惡，亦復如是，但以慈悲息此諸惡，不生瞋心。

[0096b03] 復次，菩薩知諸法不生不滅，其性皆空。若人瞋恚罵詈，若打若殺，如夢如化，誰瞋誰罵？

[0096b05] 復次，若有人如恒河沙等劫眾生，讚歎供養衣食、臥具、醫藥、華香、瓔珞，得忍菩薩，其心不動，不喜、不著。

[0096b07] 問曰：

[0096b07] 已知菩薩種種不瞋因緣，未知實讚功德而亦不喜？

[0096b09] 答曰：

[0096b09] 知種種供養恭敬，是皆無常；今有因緣故，來讚歎供養；後更有異因緣則瞋恚，若打若殺，是故不喜。

[0096b11] 復次，菩薩作是念：「以我有功德智慧故，來讚歎供養；是為讚歎功德，非讚我也，我何以喜？」

[0096b13] 復次，是人自求果報故，於我所作因緣，供養我作功德；譬如人種穀，溉灌修理，地亦不喜。

[0096b17] 復次，若人供養我，我若喜受者，我福德則薄，他人得福亦少，以是故不喜。

[0096b18] 復次，菩薩觀一切法如夢如響，誰讚誰喜？我於三界中未得脫，諸漏未盡，未得佛道，云何得讚而喜？若應喜者，唯佛一人。何以故？一切功德都已滿故。

[0096b22] 是故菩薩得種種讚歎、供養、供給，心不生喜。如是等相，名為入音聲陀羅尼。

[0096b24] 復有名寂滅陀羅尼、無邊旋陀羅尼、隨地觀陀羅尼、威德陀羅尼、華嚴陀羅尼、音淨陀羅尼、虛空藏陀羅尼、海藏陀羅尼、分別諸法地陀羅尼、明諸法義陀羅尼。

[0096b27] 如是等略說五百陀羅尼門，若廣說則無量。以是故言諸菩薩皆得陀羅尼。

[0096b29] 「諸三昧」者，三三昧：空、無作、無相。

[0096c01] 有人言：「觀五陰無我、無我所，是名為空；住是空三昧，不為後世故起三毒，是名無作；緣離十相故：五塵、男、女、生、住、滅故，是名無相。」

[0096c04] 有人言：「住是三昧中，知一切諸法實相，所謂畢竟空，是名空三昧。」

[0096c06] 「知是空已無作。云何無作？不觀諸法若空若不空、若有若無等。如佛說《法句》中偈：

「『見有則恐怖， 見無亦恐怖，
是故不著有， 亦復不著無。』」

[0096c10] 是名無作三昧。

[0096c10] 「云何無相三昧？一切法無有相，一切法不受不著，是名無相三昧。如偈說：

「『言語已息， 心行亦滅， 不生不滅，
如涅槃相。』」

[0096c15] 復次，十八空，是名空三昧；種種(丹注云：五道生有、本有、死有、中有、業)有中心不求，是名無作三昧；一切諸相破壞不憶念，是名無相三昧。

[0096c17] 問曰：

[0096c17] 有種種禪定法，何以故獨稱此三三昧？

[0096c18] 答曰：

[0096c18] 是三三昧中，思惟近涅槃故，令人心不高不下，平等不動，餘處不爾。以是故，獨稱是三三昧。

[0096c21] 餘定中，或愛多、或慢多、或見多；是三三昧中第一實義實利，能得涅槃門。以是故，諸禪定法中，以是三空法為三解脫門，亦名為三三昧，是三三昧實三昧故，餘定亦得名定。

[0096c25] 復次，除四根本禪，從未到地乃至有頂地，名為定，亦名三昧，非禪；四禪亦名定，亦名禪，亦名三昧；諸餘定亦名定，亦名三昧；如四無量、四空定、四辯、六通、八背捨、八勝處、九次第定、十一切處等諸定法。

[0097a04] 復有人言：「一切三昧法有二十三種。」

[0097a05] 有言：「六十五種。」

[0097a05] 有言：「五百種。」

[0097a06] 摩訶衍最大故，無量三昧，所謂遍法性莊嚴三昧、能照一切三世法三昧、不分別知觀法性底三昧、入無底佛法三昧、如虛空無底無邊照三昧、如來力行觀三昧、佛無畏莊嚴力嘑呻三昧、法性門旋藏三昧、一切世界無礙莊嚴遍月三昧、遍莊嚴法雲光三昧，菩薩得如是等無量諸三昧。

[0097a12] 復次，《般若波羅蜜·摩訶衍義品》中，略說則有一百八三昧：初名首楞嚴三昧，乃至虛空不著不染三昧；廣說則無量三昧。以是故說諸菩薩得諸三昧。

[0097a16] 「行空、無相、無作」者。

[0097a16] 問曰：

[0097a16] 前言菩薩得諸三昧，何以故復言「行空、無相、無作」？

[0097a18] 答曰：

[0097a18] 前說三昧名，未說相，今欲說相，是故言「行空、無作、無相」。若有人行空、無相、無作，是名得實相三昧。如偈說：

「若持戒清淨， 是名實比丘；
若有能觀空， 是名得三昧。
若有能精進， 是名行道人；
若有得涅槃， 是名為實樂。」

[0097a25] 「已得等忍」者。

[0097a25] 問曰：

[0097a25] 云何「等」？云何「忍」？

[0097a25] 答曰：

[0097a25] 有二種等：眾生等、法等。

[0097a26] 忍亦二種：眾生忍、法忍。

[0097a27] 云何眾生等？

[0097a27] 一切眾生中，等心、等念、等愛、等利，是名眾生等。

[0097a28] 問曰：

[0097a28] 慈悲力故，於一切眾生中應等念，不應等觀。何以故？菩薩行實道，不顛倒，如法相；云何於善人不善人、大人小人、人及畜生一等觀？不善人中實有不善相，善人中實有善相，大人、小人，人及畜生亦爾。如牛相牛中住，馬相馬中住；牛相非馬中，馬相非牛中，馬不作牛故。眾生各各相，云何一等觀而不墮顛倒？

[0097b07] 答曰：

[0097b07] 若善相、不善相是實，菩薩應墮顛倒。何以故？破諸法相故。以諸法非實善相、非實不善相，非多相、非少相，非人、非畜生，非一、非異。以是故，汝難非也。如說諸法相偈：

「不生不滅， 不斷不常， 不一不異，
 不去不來。 因緣生法， 滅諸戲論，
 佛能說是， 我今當禮。」

[0097b15] 復次，一切眾生中，不著種種相，眾生相、空相，一等無異。如是觀，是名眾生等。

[0097b16] 若人是中心等無礙，直入不退，是名得等忍。

[0097b17] 得等忍菩薩，於一切眾生不瞋不惱，如慈母愛子。如偈說：

「觀聲如呼響， 身行如鏡像；
 如此得觀人， 云何而不忍？」

[0097b22] 是名眾生等忍。

[0097b22] 云何名法等忍？善法、不善法，有漏、無漏，有為、無為等法，如是諸法人不二入法門，入實法相門，如是入竟。是中深入諸法實相時，心忍直入，無諍無礙，是名法等忍。如偈說：

「諸法不生不滅， 非不生非不滅，
 亦不生滅非不生滅， 亦非不生滅，
 非非不生滅。」

[0097c01] 已得解脫(丹注云：於邪見得離，故言解脫也)，空、非空(丹注云：於空不取，故言非也)，是等悉捨，滅諸戲論，言語道斷，深入佛法，心通無礙，不動不退，名無生忍，是助佛道初門。

[0097c04] 以是故說「已得等忍」。

[0097c05] 【經】

[0097c05] 得無礙陀羅尼。

[0097c05] 【論】

[0097c05] 問曰：

[0097c05] 前已說諸菩薩得陀羅尼，今何以復說「得無礙陀羅尼」？

[0097c07] 答曰：

[0097c07] 無礙陀羅尼最大故。如一切三昧中，三昧王三昧最大，如人中之王；如諸解脫中無礙解脫大(丹注云：得佛得道時所得也)。如是一切諸陀羅尼中，無礙陀羅尼大，以是故重說。

[0097c10] 復次，先說諸菩薩得陀羅尼，不知是何等陀羅尼？有小陀羅尼，如轉輪聖王、仙人等所得；聞持陀羅尼、分別眾生陀羅尼、歸命救護不捨陀羅尼；如是等小陀羅尼，餘人亦有。是無礙陀羅尼，外道、聲聞、辟支佛、新學菩薩皆悉不得；唯無量福德智慧大力諸菩薩獨有是陀羅尼，以是故別說。

[0097c17] 復次，是菩薩輩自利已具足，但欲益彼，說法教化無盡，以無礙陀羅尼為根本。以是故，諸菩薩常行無礙陀羅尼。

[0097c21] 【經】

[0097c21] 悉是五通。

[0097c21] 【論】

[0097c21] 如意、天眼、天耳、他心智、自識宿命。

[0097c22] 云何如意？如意有三種：能到、轉變、聖如意。

[0097c23] 能到有四種：

[0097c23] 一者、身能飛行，如鳥無礙；二者、移遠令近，不往而到；三者、此沒彼出；四者、一念能至。

[0097c25] 轉變者，大能作小，小能作大，一能作多，多能作一，種種諸物皆能轉變。外道輩轉變，極久不過七日；諸佛及弟子轉變自在，無有久近。

[0098a03] 聖如意者，外六塵中不可愛不淨物，能觀令淨；可愛淨物，能觀令不淨。是聖如意法，唯佛獨有。

[0098a05] 是如意通，從修四如意足生；是如意足通等，色緣故次第生，不可一時得。

[0098a07] 天眼通者，於眼得色界四大造清淨色，是名天眼。天眼所見，自地及下地六道中眾生諸物，若近若遠，若覆若細諸色，無不能照。

[0098a10] 見天眼有二種：一者、從報得，二者、從修得。

[0098a11] 是五通中天眼從修得，非報得。何以故？常憶念種種光明得故。

[0098a13] 復次，有人言：「是諸菩薩輩得無生法忍力故，六道中不攝，但為教化眾生故，以法身現於十方三界中；未得法身菩薩，或修得，或報得。」

[0098a16] 問曰：

[0098a16] 是諸菩薩功德，勝阿羅漢、辟支佛，何以故讚凡夫所共小功德天眼，不讚諸菩薩慧眼、法眼、佛眼？

[0098a18] 答曰：

[0098a19] 有三種天：一、假號天，二、生天，三、清淨天。轉輪聖王、諸餘大王等，是名假號天；從四天王天，乃至有頂生處，是名生天；諸佛、法身菩薩、辟支佛、阿羅漢，是名清淨天。是清淨天修得天眼，是謂天眼通。佛、法身菩薩清淨天眼，一切離欲五通凡夫所不能得，聲聞、辟支佛亦所不得。所以者何？小阿羅漢小用心，見一千世界；大用心，見二千世界。大阿羅漢小用心，見二千世界；大用心，見三千大千世界。辟支佛亦爾。

[0098a28] 是名天眼通。

[0098a28] 云何名天耳通？於耳得色界四大造清淨色，能聞一切聲：天聲、人聲、三惡道聲。

[0098b01] 云何得天耳通修得？常憶念種種聲。是名天耳通。

[0098b02] 云何識宿命通？本事常憶念：日月年歲至胎中，乃至過去世中，一世、十世、百世、千萬億世，乃至大阿羅漢、辟支佛知八萬大劫；諸大菩薩及佛知無量劫。是名識宿命通。

[0098b06] 云何名知他心通？知他心若有垢、若無垢，自觀心生、住、滅時，常憶念故得。

[0098b08] 復次，觀他人喜相、瞋相、怖相、畏相，見此相已，然後知心，是為他心智初門。

[0098b10] 是五通略說竟。

[0098b11] 【經】

[0098b11] 言必信受。

[0098b11] 【論】

[0098b11] 天、人、龍、阿修羅等，及一切大人，皆信受其語，是不綺語報故。

[0098b12] 諸綺語報者，雖有實語，一切人皆不信受。如偈說：

「有墮餓鬼中， 火炎從口出，
四向發大聲， 是為口過報。
雖復多聞見， 在大眾說法，
以不誠信業， 人皆不信受。」

若欲廣多聞， 為人所信受，
是故當至誠， 不應作綺語！」

[0098b20] 【經】

[0098b20] 無復懈怠。

[0098b20] 【論】

[0098b20] 懈怠法，破在家人財利、福利，破出家人生天樂、涅槃樂。在家、出家名聲俱滅，大失大賊，無過懈怠。如偈說：

「懈怠沒善心， 癡闇破智明，
妙願皆為滅， 大業亦已失！」

[0098b25] 以是故，說「無復懈怠」。

[0098b26] 【經】

[0098b26] 已捨利養、名聞。

[0098b26] 【論】

[0098b26] 是利養法如賊，壞功德本。譬如天雹，傷害五穀；利養、名聞亦復如是，壞功德苗，令不增長。如佛說譬喻：「如毛繩縛人，斷膚截骨；貪利養人斷功德本，亦復如是。」如偈說：

「得入梅檀林， 而但取其葉；
既入七寶山， 而更取水精。
有人入佛法， 不求涅槃樂，
反求利供養， 是輩為自欺！
是故佛弟子， 欲得甘露味，
當棄捨雜毒， 勤求涅槃樂！
譬如惡雹雨， 傷害於五穀；
若著利供養， 破慚愧頭陀。
今世燒善根， 後世墮地獄；
如提婆達多， 為利養自沒。」

[0098c12] 以是故，言「已捨利養、名聞」。

[0098c13] 【經】

[0098c13] 說法無所希望。

[0098c13] 【論】

[0098c13] 大慈憐愍，為眾說法，不為衣食、名聲、勢力故說；大慈悲故，心清淨故，得無生法忍故。如偈說：

「多聞辯慧巧言語， 美說諸法轉人心，
自不如法行不正， 譬如雲雷而不雨。
博學多聞有智慧， 訥口拙言無巧便，
不能顯發法寶藏， 譬如無雷而小雨。
不廣學問無智慧， 不能說法無好行，
是弊法師無慚愧， 譬如小雲無雷雨。
多聞廣智美言語， 巧說諸法轉人心，
行法心正無所畏， 如大雲雷澍洪雨。
法之大將持法鏡， 照明佛法智慧藏，
持誦廣宣振法鈴， 如海中船渡一切。」

亦如蜂王集諸味， 說如佛言隨佛意，
助佛明法度眾生， 如是法師甚難值！」

[0099a03] 【經】

[0099a03] 度甚深法忍。

[0099a03] 【論】

[0099a03] 云何「甚深法」？

[0099a03] 十二因緣，是名甚深法。如佛告阿難：「是十二因緣法甚深，難解難知！」

[0099a05] 復次，依過去、未來世生六十二邪見網永離，是名「甚深法」。如佛語比丘：「凡夫無聞，若欲讚佛，所讚甚小，所謂若讚戒清淨，若讚離諸欲。若能讚是甚深難解難知法，是為實讚佛。」是中，《梵網經》應廣說。

[0099a10] 復次，三解脫門，是名甚深法。如《佛說般若波羅蜜》中，諸天讚言：「世尊！是法甚深！」佛言：「甚深法者，空則是義，無作、無相則是義。」

[0099a13] 復次，解一切諸法相，實不可破不可動，是名「甚深法」。

[0099a14] 復次，除內心想智力，但定心諸法清淨實相中住。譬如熱氣盛，非黃見黃；心想智力故，於諸法轉觀，是名淺法。譬如人眼清淨無熱氣，如實見黃是黃。如是除內心想智力，慧眼清淨，見諸法實相。譬如真水精，黃物著中則隨作黃色，青、赤、白色皆隨色變；心亦如是，凡夫人內心想智力故，見諸法異相。觀諸法實相，非空非不空，不有非不有。是法中深入不轉，無所罣礙，是名度深法忍。「度」名得甚深法，具足滿，無所礙，得度彼岸，是名為度。

[0099a25] 【經】

[0099a25] 得無畏力。

[0099a25] 【論】

[0099a25] 諸菩薩四無所畏力成就。

[0099a26] 問曰：

[0099a26] 如菩薩所作未辦，未得一切智，何以故說得四無所畏？

[0099a27] 答曰：

[0099a27] 無所畏有二種：菩薩無所畏、佛無所畏。是諸菩薩雖未得佛無所畏，得菩薩無所畏，是故名為「得無畏力」。

[0099b01] 問曰：

[0099b01] 何等為菩薩四無所畏？

[0099b01] 答曰：

[0099b01] 一者、一切聞能持故，得諸陀羅尼故，常憶念不忘故，眾中說法無所畏故。

[0099b03] 二者、知一切眾生欲解脫因緣，諸根利鈍，隨其所應而為說法故，菩薩在大眾中說法無所畏。

[0099b05] 三者、不見若東方、南西北方、四維、上下，有來難問，令我不能如法答者。不見如是少許相故，於眾中說法無所畏。

[0099b08] 四者、一切眾生聽受問難，隨意如法答，能巧斷一切眾生疑故，菩薩在大眾中說法無所畏。

[0099b11] 【經】

[0099b11] 過諸魔事。

[0099b11] 【論】

[0099b11] 魔有四種：一者煩惱魔，二者陰魔，三者死魔，四者他化自在天子魔。

[0099b13] 是諸菩薩得菩薩道故，破煩惱魔；得法身故，破陰魔；得道、得法性身故，破死魔；常一心故，一切處心不著故，入不動三昧故，破他化自在天子魔。以是故，說「過諸魔事」。

[0099b17] 復次，是《般若波羅蜜·覺魔品》中，佛自說魔業、魔事。是魔業、魔事盡已過故，是名「已過魔事」。

[0099b19] 復次，除諸法實相，餘殘一切法，盡名為魔。如諸煩惱、結、使，欲、縛、取、纏、陰、界、入，魔王、魔民、魔人。如是等盡名為魔。

[0099b21] 問曰：何處說欲縛等諸結使名為魔？

[0099b22] 答曰：《雜法藏經》中，佛說偈語魔王：

「欲是汝初軍， 憂愁軍第二，
飢渴軍第三， 愛軍為第四、
第五眠睡軍， 怖畏軍第六，
疑為第七軍， 含毒軍第八，
第九軍利養、 著虛妄名聞，
第十軍自高、 輕慢於他人。
汝軍等如是， 一切世間人，
及諸一切天， 無能破之者。
我以智慧箭， 修定智慧力，
摧破汝魔軍， 如坏瓶沒水。
一心修智慧， 以度於一切；
我弟子精進， 常念修智慧，
隨順如法行， 必得至涅槃。
汝雖不欲放， 到汝不到處！」
是時魔王聞， 愁憂即滅去；
是魔惡部黨， 亦復沒不現！

[0099c11] 是名諸結使魔。

[0099c11] 問曰：五眾、十八界、十二入，何處說是魔？

[0099c12] 答曰：莫拘羅山中，佛教弟子羅陀：「色眾是魔，受、想、行、識亦如是。」

[0099c13] 復次，若欲作未來世色身，是為動處；若欲作無色身，是亦為動處；若欲作有想、無想、非有想非無想身，是為一切動處。動是魔縛，不動則不縛，從惡得脫。此中說眾、界、入，是魔。自在天子魔、魔民、魔人即是魔，不須說。

[0099c18] 問曰：

[0099c19] 何以名魔？

[0099c19] 答曰：

[0099c19] 奪慧命，壞道法功德善本，是故名為魔。諸外道人輩言：是名欲主，亦名華箭，亦名五箭(丹本注云：五欲箭也)，破種種善事故。佛法中名為魔羅，是業是事，名為魔事。是何等魔事？如《覺魔品》中說。

[0099c23] 復次，人展轉世間受苦樂，結使因緣，亦魔王力因緣；是魔名諸佛怨讎，一切聖人賊，破一切逆流人事，不喜涅槃，是名魔。

[0100a01] 是魔有三事：戲笑語言、歌舞邪視，如是等從愛生；縛打鞭拷、刺割斫截，如是等從瞋生；炙身、自凍、拔髮、自餓、入火、赴淵、投巖，如是等從愚癡生。

[0100a04] 有大過失不淨，染著世間，皆是魔事。憎惡利益，不用涅槃及涅槃道，亦是魔事。沒大苦海，不自覺知。如是等無量，皆是魔事。

[0100a07] 已棄已捨，是為「過諸魔事」。

[0100a09] 【經】

[0100a09] 一切業障悉得解脫。

[0100a09] 【論】

[0100a09] 一切惡業得解脫，是名「業障得解脫」。

[0100a10] 問曰：

[0100a10] 若三種障：煩惱障、業障、報障；何以捨二障，但說業障？

[0100a11] 答曰：

[0100a12] 三障中業力最大故；積集諸業乃至百千萬劫中，不失、不燒、不壞，與果報時不亡。

[0100a14] 是諸業能久住，和合時與果報；如穀草子在地中，得時節而生，不失不壞。

[0100a15] 是諸佛一切智，第一尊重，如須彌山王，尚不能轉是諸業，何況凡人！如偈說：

「生死輪載人，諸煩惱結使，
大力自在轉，無人能禁止。
先世業自作，轉為種種形，
業力最為大，世間中無比！
先世業自在，將人受果報，
業力故輪轉，生死海中迴。
大海水乾竭，須彌山地盡，
先世因緣業，不燒亦不盡。
諸業久和集，造者自逐去，
譬如責物主，追逐人不置。
是諸業果報，無有能轉者，
亦無逃避處，非求哀可免。
三界中眾生，追之不暫離，
如珂梨羅刹，是業佛所說。
如風不入實，水流不仰行，
虛空不受害，無業亦如是。
諸業無量力，不逐非造者；
果報時節來，不亡亦不失。
從地飛上天，從天入雪山，
從雪山入海，一切處不離。
常恆隨逐我，無一時相捨；
直至無失時，如星流趣月。」

[0100b11] 以是故說「一切諸業障悉得解脫」。

[0100b12] 【經】

[0100b12] 巧說因緣法。

[0100b12] 【論】

[0100b12] 十二因緣生法，種種法門能巧說煩惱、業、事法，次第展轉相續生，是名十二因緣。是中無明、愛、取三事，名煩惱；行、有二事，名為業；餘七分，名為體事。

[0100b15] 是十二因緣，初二過去世攝，後二未來世攝，中八現前世攝。

[0100b17] 是略說三事：煩惱、業、苦。是三事展轉更互為因緣：是煩惱業因緣，業苦因緣，苦苦因緣，苦煩惱因緣，煩惱業因緣，業苦因緣，苦苦因緣，是名展轉更互為因緣。

[0100b20] 過去世一切煩惱，是名「無明」。

[0100b21] 從無明生業，能作世界果，故名為「行」。

[0100b22] 從行生垢心，初身因，如犢子識母，自相識故，名為「識」。

[0100b23] 是識共生無色四陰，及是所住色，是名「名色」。

[0100b24] 是名色中生眼等六情，是名「六入」。

[0100b25] 情、塵、識合，是名為「觸」。

[0100b26] 從觸生「受」。

[0100b26] 受中心著，是名「渴愛」。

[0100b26] 渴愛因緣求，是名「取」。

[0100b27] 從取後世因緣業，是名「有」。

[0100b28] 從有還受後世五眾，是名「生」。

[0100b28] 從生五眾熟壞，是名「老死」。

[0100b29] 老死生憂、悲、哭、泣，種種愁惱，眾苦和合集。

[0100c01] 若一心觀諸法實相清淨，則無明盡，無明盡故行盡，乃至眾苦和合集皆盡。

[0100c03] 是十二因緣相，如是能方便不著邪見，為人演說，是名為「巧」。

[0100c04] 復次，是十二因緣觀中，斷法愛，心不著，知實相，是名為「巧」。如彼《般若波羅蜜·不可盡品》中，佛告須菩提：「癡如虛空不可盡，行如虛空不可盡，乃至眾苦和合集如虛空不可盡。菩薩當作是知！作是知者，為捨癡際，應無所入。作是觀十二因緣起者，則為坐道場，得薩婆若。」

[0100c11] 【經】

[0100c11] 從阿僧祇劫已來，發大誓願。

[0100c11] 【論】

[0100c11] 「阿僧祇」義，〈菩薩義品〉中已說。

[0100c12] 「劫」義，佛譬喻說：「四千里石山，有長壽人百歲過，持細軟衣一來拂拭，令是大石山盡，劫故未盡。四千里大城，滿中芥子，不概令平；有長壽人百歲過，一來取一芥子去，芥子盡，劫故不盡。」

[0100c16] 菩薩如是無數劫，發大正願度脫眾生。「願」名大心要誓，必度一切眾生，斷諸結使，成阿耨多羅三藐三菩提，是名為「願」。

[0100c20] 【經】

[0100c20] 顏色和悅，常先問訊，所語不麤。

[0100c20] 【論】

[0100c20] 瞋恚本拔故，嫉妬除故，常修大慈、大悲、大喜故，四種邪語斷故，得顏色和悅。

[0100c22] 如偈說：

「若見乞道人， 能以四種待：
初見好眼視， 迎逆敬問訊，
床座好供養， 充滿施所欲；
布施心如是， 佛道如在掌。
若能除四種， 口過妄語毒，
兩舌、惡、綺語， 得大美果報。」

善軟人求道， 欲度諸眾生，
除四邪口業， 譬如馬有轡！」

[0101a06] 【經】

[0101a06] 於大眾中得無所畏。

[0101a06] 【論】

[0101a06] 大德故，堅實功德智慧故，得最上辯陀羅尼故，於大眾中得無所畏。

[0101a08] 如偈說：

「內心智德薄， 外善以美言；
譬如竹無內， 但示有其外。
內心智德厚， 外善以法言；
譬如妙金剛， 中外力具足。」

[0101a13] 復次，無畏法成就故，端正、貴族、大力，持戒、禪定、智慧、語議等皆成就，是故無所畏。以是故，於大眾中無所畏。

[0101a15] 如偈說：

「少德無智慧， 不應處高座，
如豺見師子， 竄伏不敢出。
大智無所畏， 應處師子座，
譬如師子吼， 眾獸皆怖畏！」

[0101a20] 無量無邊智慧福德力集，故無所畏。

[0101a20] 如偈說：

「若人滅眾惡， 乃至無小罪，
如是大德人， 無願而不滿。
是人大智慧， 世界中無惱，
是故如此人， 生死涅槃一。」

[0101a26] 復次，獨得菩薩無所畏故，如《毘那婆那王經》中說。菩薩獨得四無所畏，如先說。

[0101a28] 【經】

[0101a28] 無數億劫說法巧出。

[0101a28] 【論】

[0101a28] 不放逸等諸善根，自身好修。是諸菩薩，非一世、二、三、四世，乃至無量阿僧祇劫集功德智慧。如偈說：

「為眾生故發大心， 若有不敬生慢者，
其罪甚大不可說， 何況而復加惡心！」

[0101b04] 復次，是菩薩無數無量劫中，修身、修戒、修心、修慧，生滅、縛解、逆順中，自了了知諸法實相。

[0101b06] 有三種解：聞解、義解、得解。種種說法門中無所罣礙，皆得說法方便、智慧波羅蜜。是諸菩薩所說，如聖人說，皆應信受。如偈說：

「有慧無多聞， 是不知實相；
譬如大闇中， 有目無所見。
多聞無智慧， 亦不知實義；
譬如大明中， 有燈而無目。」

多聞利智慧， 是所說應受。
無慧亦無明， 是名人身牛。」